



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

PM Benjamin-i Hamas indang ceasefire sentong magizük

Küm 5 sülen Djokovic Indian Wells nung asayatsü

VOL. XXI ISSUE NO. 117 (ADOK 117) DIMAPUR ROGONÜ (FRIDAY) TSÜKLAI (FEBRUARY) 09, 2024 ₹ 5.00

## Ozü kaketshir nem ochi obendang agütsütsüla: NSF

**Dimapur, Tsüklai/February 08 (TYO):** Tetsu College nung 2nd Semester azünger Moalong Jamir dak Anti Vehicle Thief Squad (AVTS) ajanga January 29, 2024 nü züka merenshiba khukhua aitsür, ta Naga Students' Federation (NSF) sangdong ka ajanga ashi.

AVTS ajanga Moalong Jamir dak iba ama tashiyim mapa inyakba yagi kaketshir ajanga aoksatsüba kisüng masü saka ozüng amshirtem nungi nisung kari tashi tali amshiba nung tasüngdanga tulu adoker.

Naga nung kaketshir ajanga ola ama timtem ajuru aliba kaketshir den NSF dena lir aser kaketshir mesüra shiba dak südir süaka iba ama tashiyim amshiba aitsür, ta sangdong ajanga ashi.

Moalong Jamir indang abelen ear drum aser tongtoret raksatsüba, tezüngjang ka wakdaksüba ajanga iba tensa tali jangja meteter. Iba ya ajanga aibelener nem tapet temerenshi agütsütsü asoshi tekeraba nung ochishia aser kanga junga bushisüngdangtsü nungdaker, ta NSF tir Medovi Rhi aser Education secretary Temjentoshi nati sangdong nung ashi.

Tim masüba nung tashi amshiba ken o nung ochishia inyaksangshitsü kanga tongtipang. Nüburtem kumzüka ayutsü asoshi police temi tongti shilem agiba atema pelar, saka

mapang ajak nung 'justice, fairness' aser meimchir temeden wazüka ayutsü kanga tongtipang, ta ashi.

Moalong Jamir dak züka merenshiba police personnel tem anogo asem tsüngta mapa nungi suspend sütsütsüla aser parnok mapa nungi anentsüba totuyuba ya nüburtem dang sayutetsüla, ta NSF ajanga ashi.

Aibelener anema tapet mera magira, timtem ajurur alir nem ochi obendang agütsütsü aser tarutsü nung iba ama timtem majurutsü mechi Naga Students' Federation-i pei yimya nung temeden bushitsü.

Tzüzüng-ozüng shidak amshitsü nunglokja alir temi timmasüba nung tashi amshiba ya tejashitsü mapa lir aser kechi tensa südir süaka ochi obendang agütsütsü tim ta NSF tangatetba lir.

Anungji iba tatalokba atema ketdangtsü temi shidak bushisüngdanga nüburtemi temulung kemtetsüsa aibelener nem obendang agütsütsü ajungshir, ta ashi.

Timtem ajurua alir aser par kinungertem den tejashi lemsateper aser kasa mapang tekolok aser mulungsentsü shidak alir ajak, lokti tentet balala aser nüburtem dang iba ama tashiyim mapa aitsütsü ayongzük. Nisung ajanga temeden wazüka ayutsüsa asenok külemi inyaksüla, ta NSF ajanga ashi.

## Wokha district ajungalen maneni mokdangtsü

**Dimapur, Tsüklai/February 08 (TYO):** Wokha district nung aliba civil society organizations (CSOs) temi sangdongba ama Wokha district ajanga aoba National Highway mapang telatet makai February 8, 2024 anepdang 6:00 ako nungi mokdang tenzükogo aser kasa yimya nung February 9, 2024 anogoa mokdangtsü, ta sangdong ka ajanga ashi.

Ketdangtsü nungi February 9, 2024 nikongdang 6:00 ako tashinung telangzüba tajung ka magütsüra asendenshir Deputy Commissioner Wokha indang office aser SDO (NH) Wokha indang office tema shibangtsütsü, ta sangdong ajanga ashi.

Kasa mapang gari senzüsebongba ajanga nokdangtsü aser district nung commercial establishments ajanga shibangtsü.

Iba mokdang nung police, paramilitary forces, ambulance aser nija gari nung shiranger aser nisung tasümgang bena aliba dena medical services, fire and emergency services, postal services aser osangbener madentsü.

District telungzük nung medical emergency atema nüburtemi Village Council ketdangtsü mesüra Colony Council chairmen nungi 'witness documents' meshitsüla aser car pass meshitsü atema bandh volunteers dang sayutsüla, ta sangdong ajanga ashi.

Lenmang tajung alitsü temeden atema tejangja takhangba agütsüba asen adianu Naga nung aser talisa külem Lotha nung ajanga dang angateta iba tongpang nung amalitep akatsü ayongzük, ta sangdong ajanga ashi.

## Mon nung Addiction Treatment Facilities semzükogo

**Dimapur, Tsüklai/February 08 (TYO):** Mon District Hospital nung February 8, 2024 nü virtual yimya nung Addiction Treatment Facilities semzükba sentong ka agia liasü.

Iba mapang Union Minister of State for Social Justice & Empowerment, Ramdas Athawale; Minister of State for Social Justice & Empowerment, A. Narayanaswamy aser Union Minister of State for Social Justice & Empowerment, Pratima

Bhounik nungertem lia Nalanda Hall, Dr Ambedkar International Centre, 15 Janpath, New Delhi nungi Union Minister of Social Justice & Empowerment, Dr Virendra Kumar-i Addiction Treatment Facilities 41 virtual yimya nung semzüktsü.

Mon nung iba sentong nung Deputy Commissioner, Mon, Ajit Kumar Verma, IAS; Medical Superintendent, District Hospital Mon, Dr. Gwalozu Thong aser ketdangtsütem dena liasü.

## Advisor Yhome-i jembiba khukhua aitsür: SKK & AKM

**Dimapur, Tsüklai/February 08 (TYO):** Aruya aliba küm ter asoshi Sumi aser Ao kin nungi primary tesayur meshimtsü ta Advisor, School Education & SCERT, Dr. Kekhrielhoulie Yhome yashi-yakünü jembiba khukhua aija All Sumi Students' Union (SKK) aser Ao Kaketshir Mungdang (AKM) ajanga sangdong ka agüja liasü.

"Taruba küm ter atema onoki Sumi aser Ao primary teachers meshimtsü..." ta Advisor-i ashiba atema kanga jashir, kechiaser primary tesayur shimba maparen nung Sumi aser Ao kin küm ter tashi medendaktsütsü ta ashir, ta SKK tir Gihuka K Zhimo aser AKM tir Lanutoshi Aier nati sangdong ajanga ashi.

Iba sangdong yagi ozü kin sasep nung temulung khurema jashiba adokdaksüogo. Iba ama züngdoka amshiba yimya yagi ochi aser ajak kasa tangatetba nung tetsükdaktsü agütsüba dang masü saka shisaliok aser employment tsütsü Sumi aser Ao kin anema tanen makai inyakba ayur, ta ashi.

Shisaluyimba nung temelenshi tajung bener arutsü merangba atema onoki Dr. Yhome dang pelar, saka primary teacher shimba nung küm ter atema Sumi aser Ao kin medendaktsütsü ta jembiba ajanga ajak nem kasa maongka agütsütsü nükjidong aliba tangatetba den mapeter, ta kaketshir telok ana yagi sangdong ajanga ashi.

Iba ama sangdong ya bensaa amshiba dang masü saka tajungertem shimba tangatetba nunga tarak kettsür.

Tesayurtem ya kin telemsa nung ajemdaker masü saka qualifications, skills aser merit nung ajemdaker shimtsü kanga tongtipang lir. Onok Sumi aser Ao kin ya Zunheboto aser Mokokchung district kisüng nung masü tesem balala nung alir. Iba yimya nung tesayurtem shimtsü jembiba ajanga Advisor-i state tesem ajungalen aliba ozü lanur tashi-temeteter tem sempet aser tashi mezüngshiba sayur.

Ajidang masü, kin ana nungi training agir aser zünga-meteta

aliba kaketshir tarutsü küm ter atema teimla samatsüba bilemstür. Tesayur mapa inyaktsü parnok nem maongka magütsüba yagi parnok takum alitsü temeden agientsür aser 'inequality' nung tawa tuluba kumdaktsütsü, ta SKK aser AKM sangdong ajanga ashi.

Ano Sumi aser Ao kin nungi tesayurtem mapa nungi anisüngzükba mapang onok kin nungi parnok melentsü nungdaker. Dr. Yhome-i iba indang teblemstü mejembi aser sorkari education sector asoshi nükla tajung yur sentong yangluba nung temulung melemtetsüsa akumer, ta ashi.

Anungji Advisor, School Education & SCERT dang pai jembiba tanaben asadangshitsü aser tesayur shimba maparen ochishia inyaktsü aser merit nung ajemdaker shimtsü ajungshir.

Shisaluyim dang masü lenla ajanga nung All Sumi Students' Union aser Ao Kaketshir Mungdang ajanga ozü kin temeden asoshi bendanga agütsür nokdaksü, ta kasa sangdong ajanga ashi.

## OKM-i Nagaland Police AVTS Team aitsür

**Mokokchung, February/ Tsüklai 08 (TYO):** Ongpangkong Kaketshir Mungdang (OKM) ajanga January 29, 2024 anogo New Showba Village nung Tetso College Dimapur nung azünger arishi küm 19 tain Sb.Moalong Jamir dak Nagaland Police AVTS Team puri kaketshir ka dak tai inyakba kuli kecha mali sür teka sangshia yirutsüba asoshi khukhua aitsürta OKM sangdong ka nung OKM Tir Sb.Limatongzük Jamir aser

Tongti Zülur Sb.Sungkumjang Kichu ajanga metetdaksüogo.

Nagaland Police tzüzüng ozüng shitak amshia nübur azüokba dak alaka tai maketbapur dak tashiyim amshitsü tashi malita OKM ajanga Nagaland Police iba sangdong ajanga aitsü.

Nagaland Police-i iba ama tashiyim mapa inyakba ya asoshi nübur akai taitüba ola adoktsü nungtaker aser tashi amshirtemi aibelenernem nem tapet temerenshi tekaratiba nung

agütsütsüla takhangba OKM ajanga metetdaksüogo.

Ano tanga sangdong ka nungsa Soyim Shisaluyim Telongjem ajanga Soyim Shisaluyim Telongjem züngsem tajung Sb.Moalong Jamir dak Nagaland Police AVTS Team iba ama tashiyim meimchir dak mapetba inyakba asoshi Soyim Shisaluyimer Telongjem Tir Moatemsu Longkumer aser Tongti Zülur Merennukshi Imsong ajanga taitüba metetdaksüogo.

## OATT & MTABCM-i mi lendong agi takoksa ajururtem den sarasadem ayongzük



OATT aser MTABCM-i ayonga MMC complex nung mi lendong agi takoksa ajururtem den telongjem sarasadem ka akaba mapang tangokba noksa nung angur. (Mokokchung, February 8, 2024)

**Mokokchung, 8th Feb (TYO):** Ongpangkong Arogo Tenzükter Telongjem (OATT) aser Mokokchung Town Ao Baptist Churches Mission (MTABCM) nati külem sür Feb 3 aonung Mokokchung MMC Complex nung mi lendong ajurua dokan rungtoker kiburtem den telongjem sarasadem sentong ka

MMC Complex nung ayongzüka katsü.

Iba sentong nung OATT aser MTABCM nungi toklang tenzükertemi anir MMC staff aser temulungertem aika adenshia takoksa ajururtem asoshi Tsüngrem dang taochi aser tesüneptsüba meshia sarasademtsüba den ano aria

bilem aser mulung sünep o ajanga lemsatep.

MMC mi lendong nung dokan rungtokba ajak agi 62 liasü aser dokan kibur parnok 59 lir. OATT aser MTABCM-i sarasadem den tenla sen 7, 10,000/- (seven lakh ten thousand) saruteta takoksa ajururtem nem agütsüogo.

(Maneni tapak 2 nung...)

## Mokokchung Forest Division-i Forest Resource Centre semzükogo



**Dimapur, Tsüklai/February 8 (TYO):** Mokokchung Forest Division-i, February 8 nü Forest Resource Centre semzükogo. Iba centre ya Conservator of Forests, Nagaland Kohima Hemant B. Kamdi IFS-i semzükja liasü.

Sentong nung Divisional Forest Officer Dr Sentitula IFS-i ashiba agi, Forest Resource Centre tenzükba ya alima tesem balala nung biodiversity yanglushitsü merangba mapang ka lir saka asenokbo tia ka biodiversity peria lir, ibayongji iba centre ya tenzük.

Arem wazüka ayutsü atema inyaker kaka ama onoki süngtonlitong leprepa aoba aser arem nung morok mi adokba amala nokdangtsü asoshi takok tashi jenjang agidar, ajisüaka lokti-i item inyakyimtem kangabo mejangja. Anungji iba dak sendakba nung shisatsü agütsütsüji onok khuret lir, ajita asünungdang tanurtem aser stakeholder temi pei temeket nung aliba arem, shiruru aser süngtonlitongtem, meimchirtem inyakyim ajanga lendong bener arutsütsü ana

nung aliba aser forest department-i item ya bentettsü asoshi inyakbatem indang angatettsü, ta lai ashi.

Tzü mopung meleshia aoba mapang ka nung school curricula dak alia tanga shisatsü agütsütsüji kanga tongtibang. Forest Resource Centre ya latest educational software, display plinths aser Mokokchung Forest Division nungi signature specimen, interactive quiz atema touch display aser virtual based forest experience amala advanced interactive panel tem amshia tangazükba agüja shisatsü metongjemi aliba tongdaksütsü nükjidong nung amenokogo.

Kaketshirtem, iba centre semdangertem aser academician temi Nagaland indang fact tem, asenok temeket nung aliba aremtem indang movie tem repranga tangazükba angutsü aser iba den quiz nung shilem agitettsü aser iba indang osang proksü atema pamphlets/newsletters/leaflets amala resource material tem bendentettsü, ta Sentitula-isa shisem.

Kasa mapang nung

Conservator Of Forest Hemant B Kamdi-i, Forest Resource Centre ya forest awareness sentongtem tali jangrattemba aser interactive kümdaksütsü atema game mode nung Augmented Reality Approach ka benokba state nung mezüngbuba lir, ta ashi.

Onoki kaketshirtem jangrabangradaksütsü aser aremtem kümzüka ayutsü atema kidangi osang kabosa bener aotsü atema angazükba yimya balaka benoker. Nisung kati pei meketa aliba aremtem pei meyong ta kodang angatetdir parnok temelenshi asoshi hadir ka akümer. Resource Centre ya online senden, interactive session, collaborative learning aser divisional sendentem atema centre ka lir, ta paisa shisem.

Iba centre semzükba sülen Field Executive staffs shirnok Forester Grade II nungi I aser Forest Guard nungi Forester-II jenjangi ajungketogo, parnok atema Pipping Ceremony agia liasü. Iba sentong nung Mokokchung Forest Division officer aser staff temi shilem agia liasü.

## KU-i ayongzüka Student Development Program & Career Workshop agiogo



**Dimapur, Tsüklai/February 8 (TYO):** Kaziranga University-i ayongzüka Sainik School, Peren nung Student Development Program aser Career Workshop sentong ka agiogo.

Kaziranga University-i, career takok ngua renlokyonga aotsü atema soft skills koda tongtibang indang indang lanurtem nem tangazükba agütsütsü atema skill development balala indang Student Empowerment seminar ka kaja liasü.

Assam Rifles aser Kaziranga University na longjemer Peren district kübok Sainik School Punglwa nung February 7 nü iba sentong ayongzüka agia liasü.

Building Youth for the Nation omen nung ajemdaker aiba sentong nung school züngzüka sülen career asoshi lenmang shitak shimtsü aser tarutsü yanglutsü atema skill shitak aser yimayimpong shitak angazüktsü koda tongtibang iba indang tangazükba balala agüja liasü.

Kasa mapang nung kaketshirtem dang communication amala koba career ajak nung kanga tongtibang lir iba amala art tem koda renloka aotsü iba indang sayua liasü.

Sentong nung shisalen sayurtemji Manager Kaziranga University Abhijeet Bhardwaj aser CMO & Dean Kaziranga University Bobby Roy na liasü. Anogoshia nisung ka dak nungi

taginüba jenjang taliba küma aoba mapang ka nung sabang ajak nung mapa asoshi educational qualifications dang masü saka tanga soft skills tem nüngdaker iba indang tangazükba agütsütsü nükjidong nung iba sentong ayongzüko.

Seminar tatemi kaketshirtemi parnok tajangshiba lemsatep shirnok sentong nung adenba ajanga kanga ajungmesoa liasü. Iba workshop nung kaketshir 320 shi-i shilem agia liasü.

Iba amala sentong tajung ayongzüka katsüba atema School ketdangsurtem, tesayurtem aser faculty temi Assam Kaziranga University aser Assam Rifles dang kanga pelaba lemsatapa liasü.

## Kohima DC-i gari senzusenpongtsü tetuyuba agütsü

**Dimapur, Tsüklai/February 8 (TYO):** Kohima Deputy Commissioner Kumar Ramnikant-i sangdong ka ajanga, Kohima Smart City Development Limited Junction temi February 10 aonung 8:00 nungi anepdang Deobar anepang 5:00 ako tashi nung Kohima Local Ground kübok Razhü Point Junction aser D-Block ajanga Phoolbari Junction tsüngda hume pipe inoktsü aliba dak sendakba nung gari senzusenpong asoshi tetuyuba ka agütsüo.

Iba dak sendakba nung Honibar aonung 8 ako nung Deobar anepdang 5 ako tashi Razhü Point Junction nungi D-Block ajanga Phoolbari

Junction tashi gari kecha senzusenpong mesüdaksütsü aser agüja aliba mapang aser anogo Old NST lenmang amshitsü aser Phoolbari Junction aser Old NST lenmang ajanga Razhü Point tashi two way traffic lapoktsütsü.

Paisa, Phoolbari Junction aser Old NST lenmang ajanga Razhü Point tashi nung agüja aliba mapang aser anogo gari kecha anentsü memelatsü, ta metetdaksüo. Nüburtem ajaki anidaksü atema iba tetuyuba agütsüo aser tetuyuba sülen manidakterem temzüng ozüng dak ajemdaker tapet temerenshi agütsütsü, ta DC-isa metetdaksü.

## Kohima DC-i Mobile Demonstration Van tenzüksü



Kohima DC-i Mobile Demonstration Van tenzüksüba sentong nung tangokba noksa angur.

**Dimapur, Tsüklai/February 8 (TYO):** SVEEP inyakyim aser taruba 2024 Lok Sabha General Election dak sendakba nung tangazükba agütsütsü aser EVM/VVPATs amshiyim metetdaksütsü atema Deputy Commissioner & District Election Officer, Kumar Ramnikant IAS February 8 nü Deputy Commissioner office nungi Mobile Demonstration Van ka tenzüksüo.

Sentong nung o jembiba mapang Ramnikant-i, Electronic Voting Machine (EVM) aser Voter Verifiable Paper Audit Trail (VVPAT) dak sendakba nung linük ajunga nung awareness sentong agidar, koba nüburtem nem vote agütsüba yimya aser machine amshiyim angazükdaksütsü atema benoka inyakkdar, ta ashi.

Awareness sentong koba

Lok Sabha aser State Legislative Assembly General Election magi tsüngda ayongzüka agir, iba sentong ya EVMs aser VVPATs indang aser vote agütsüba yimya tatongi sayutsü, VVPAT slip ajanga voter temi parnoki ajentsüba vote koda jangjashitsü, iba indang tangazükba agütsütsü asoshi ayongzüka agir, ta DC-i ashi.

Inyaka sayuba ajanga EVM aser VVPAT inyakyim tali tajungba angateter aser iba ya nüburtemi temulung melemi bilemba agintsütsü, voter tem tali temulung lemteta kümdaksütsü aser electorate tem nem shisatsü timba agütsütsü asoshi lir, ta pai ashi.

DC-isa, nüburtem dang tejak dangi arua EVM aser VVPAT demonstration aser awareness sentong nung shilem agitsü ayongzüko.

## OATT & MTABCM-i mi...

(TAPAK 1 NUNGI...)

Iba sentong nung OATT tir - Mar, OATT tezülur - Lemtila, MTABCM tezülur - Sentiyanger, Rev. Nungshi aser Rev. Temsiwati parnoki shilem balala agi. Takoksa ajurur ajak tenüng nung nisung kati shilem agia iba ama sentong tajung ayongzüka den tenla tulu agütsüba asoshi OATT aser MTABCM dang pelaba metetdaksü. OATT kübok arogo 33 lir aser MTABCM ya arogo 10 lungjemer akümba

tentet ka lir.

Dokan rungtokba ajakji liso nisungtem indang dang liasü aser dokan kiburtemji tetsür teimba lir. Tang tashi nung ano dokan rungtokertem atema temelen dokan mentettsüsa kecha renemja maka. Iba den complex nung dokantemji kanga mejungi rungtokba ajanga nübur kümzüka ayutsü meji ki rungtokba tesem aser iba kadak aliba dokantem ajak administration-i shibangja lir.



February 08, 2024 nü Parliament nung budget senden tagidak mapang DMK MP tem- TR Baalu, Kanimozhi, A Raja aser tangartemi Mahatma Gandhi kürakyanglu anasa longkak aitba noksa nung angur. Centre sorkari state tem bendangshidanga senotsü lezmüksür, ta tai tonglokja parnoki longkak ait.

### Linük rongsenkettzüng jenjang mejungi aliba asüngsashigo: NDA

**New Delhi, February 08 (Agencies):** Brihostibarnü Parliament nung NDA sorkari tesüiba küm 10 tsüngda linük rongsenkettzüng jenjang asüngsashiba indang 'white paper' metetdaksü. Union Finance Minister, Nirmala Sitharaman-i Parliament nung white paper ji benoka liasü. White paper nungji yamai shia lir, taoba UPA sorkari yutsüba tayongzükbatem NDA sorkari koktetogo aser linük aintsü atema tongtiban

telemtetba aika agiogo. 'White Paper on the Indian Economy' ajanga ashiba agi, 2014 küm Modi sorkar akümba mapang nung linük rongsenkettzüng jenjang kanga mejungi liasü, taoba sorkari rongsenkettzüng timi mamshi, senotsü inyakyim meshidak aser ochimashi jenti liasü. "Tensa mejungi liasü. Rongsenkettzüng jenjang mejungi aliba metongshitsü aser yimsüsübaren asüngsashitsü atema tayongükba tulu liasü. Kanga mejungi raksar aliba

rongsenkettzüng jenjang 2014 küm NDA sorkari senmanga liasü," ta white paper nungji shia lir. "Taoba sorkar ama masü saka ozü sorkaribo rongsenkettzüng jenjang ajungtsü atema tamendakdak yangluba nung senotsü indok. Tesüiba küm 10 meyipa reprangdangra, taoba sorkari toktsüba tayongzükbatem ajak onoki koktetogo, ta ajemalua aser melung süa onoki shitetter," ta white paper nungjisa shia lir.

### India-i Maldives nungi sepaitem anir arutsü telemtetba agiogo

**New Delhi, February 08 (Agencies):** India aser Maldives na tsüngda mangatettep adoka aliba mapang ka nung Brihostibarnü India-i Maldives nungi sepaitem anir arutsü aser technical personnels toktsütsü telemtetba agiba metetdaksü. Tamalen Mohamed Muizzu-i aniba Maldives sorkari Maldives yimtiba, Male nungi India nung sepaitem agientsü mepishia liasü. Iba onük atema linük anaprongla nungi ketdangsertemi tentetba high-level group ka senden aiben mena liasü aser tatembangbuba sendenji February 2 nü New Delhi nung amen. Tan ita tatembanglen-a senden ka mena kasa onük nung o lemtepsü.

Brihostibarnü New Delhi nung osangbenertem den jembidang Ministry of External Affairs (MEA) otongdar Randir Jaiswal-i, tang Maldives nung aliba sepaitem anir aruba sülen parnok melen Indian technical personnels toktsütsü, ta metetdaksü. Maldives Foreign Ministry-ia sangdong ka ajanga, India-i March 10 nungi tenzüka maparen tenzüksü aser May 10 tashi nungbo tembangtsü, ta metetdakja liasü. Maldives Tir election atema nüboyimba mapang nung Mohamed Muizzu-i Maldives nungi India nung sepaitem aienshidaktsütsü, ta nangzüka liasü. Ajioda pa Tir akümba sülen pai India dang sepaitem aienshitsu atema aiben mepishiogo.

Tang Maldives nung India nung sepai 70 den tayimtsü lir. Central budget nung Maldives nem senotsü lezmüksüba dak sendakba nung tasüngdangba ka langzüdang Jaiswal-i, Maldives nem sen crore 779 lezmüksüogo, aser ibaji ajanga India-i terenlok partner ka ama inyakba kuli sayur, ta ashi. Ano tanga osang ka nung, International Monetary Fund (IMF)-i Maldives nung rongsenkettzüng dak sendakba tayongzükba aika aliba metetdaksüogo. Ano külen climate change ajanga Maldives kongshitsüsa lir, anungji iba linük nung tzümetsüing lendong atalokba den tzüym nung tzü level tali atuba ajanga lendong ajurutsüa akok.

### Centre sorkar tamakok metetdakja Congress-i 'Black Paper' saya

**New Delhi, Tsüklai/February 08 (Agencies):** Tang tagidak budget senden nung Centre sorkari 'White Paper' sayatsü lia ibaji anema Congress-i "Black Paper" saya. Brihostibarnü New Delhi nung osangbenertem den jembidang Congress party Tir, Mallikarjun Kharge-i, "Black Paper" nung sorkari mapa manguba tebilemstsü, osettsüset jenjang atuba aser aluyimertem tebilemstsü onüktem nung tamakok anguba metetdakja lir, ta ashi. "Onoki tongtibangtiba tebilemstsü- mapa manguba tebilemstsü onük benoker, ajisüaka BJP-i iba indangji kodanga mejembir. Kerala, Karnataka aser Telangana ama BJP sorkar maliba state tem bendangshidanga züngshir," ta Kharge-i ashi. "Centre sorkari BJP sorkar maliba state tem nem nungdakba senotsü peria melezmüksür, ajisüaka lezmüksüba senotsü meindoker ta aitsür. Ajisüaka yamaji masür. Maparen junga inyaktettsü atema senotsü temadokba sülen senotsü tali lezmüksütsüla," ta pai ashi. Congress Tirisa, Centre sorkari asalentong ka kübok metetsümonga senotsü soita ayur, ta ashi. Congress leniri, Centre sorkari osettsüset/chiyungtsü nung jenjang atuba mazüokteter; Centre sorkari Essential

Commodities Act amshia nungdakba chiyungtsütem nung jenjang atuba mazüokteter, ta metetdaksü. BJP aitsüba olen ka nung Kharge-i, "Jenjang atuba mapang nung par tembartemi bendanglen nungi nungdakbatem alizüka rong nung bener arur, aser saru magütsütsü atema tzüym nung dang ayur. Jenjang tali atuba mapang nung parnoki osettsüset abenba rongji rong anendak dang ayur," ta ashi. "Parnoki (sorkar) jenjang auba data ji Jawaharlal Nehru aser Indira Gandhi nunger mapang den medemdang. Tanü nenoki yimsüsür, anungji jenjang atuba azüoktsü atema nenoki kechi telemtetbatem agia inyak?" ta pai asüngdang. "Parnoki aluyimertem dang MSP (Minimum Support Price) tutsütsü aser aluyimertem income anasü kümtsütsü ta nangzük. Itemji benoka inyaker asü? Parliament nung item tasüngdangba atema telangzüba magütsür," ta pai ashi. Kharge-isa, BJP-i election nüboyim atema electoral bond nungi senotsü tim mesüi amshir; electoral bond ajanga parnok election nüboyim atema parnoki ED aser CBI notice agüja industries amokmerener, ta tai tongloktsü. Item senotsüji amshia democracy raksatsür; tesüiba küm 10 tsüngda MLA411-i BJP nung denogo, ta pai ashi.



February 08, 2024 nü Mumbai nung aliba RBI headquarters nung osangbenertem senden ka ayongzüka Reserve Bank of India (RBI) Governor, Shaktikanta Das-i Monetary Policy sangdong agütsüdang tangokba noksa nung angur.

### BJP-i Gujarat nung Lok Sabha menden ajak nungi takok angutsü: Survey

**New Delhi, February 08 (Agencies):** India Today indang 'Mood of the Nation' survey ajanga, taruba Lok Sabha election nung BJP-i Gujarat nung menden 26 prongla nungi takok angutsü, ta asadangtetogo. Mood of the Nation survey nung Lok Sabha constituency ajak kübok nisung 35,801-i shilem agia liasü. Opinion poll ya yaküm December 15 nungi taküm January 28 tashi nung agia liasü, anungji tesüiba hopta ishika tsüngda linük nung yimtenren tensa melenshibabo iba tasadangba nung züngshia mali. Mood of the nation survey ajangasa, taruba Lok Sabha election nung Gujarat nung Congress-i tamakok anguba dang masü saka vote shilem-a 2019 küm election dang nungi tajemba angutsü; 2019 küm election nung Congress-i vote shilem 32 ngua liasü saka taruba election nungbo Congress-i vote shilem 26 shi dang angutsü, ta bushitet. Gujarat nung BJP-i aniba NDA-i vote shilem 62 asütsü aser Independents den tanga party tilatemi vote shilem 12 shi angutsü, ta kasa survey ajanga bushitet. BJP-i Lok Sabha election atema Gujarat nung nüboyim tenzüko; 2022 küm Gujarat assembly election nung BJP-i menden 182 nungi menden 156 nguteta liasü. Gujarat assembly election nung BJP-i tenetben tashi atonga takok nguogo. Yaküm BJP Gujarat Tir, CR Paatil-i party nung inyakterem dang BJP-i Lok Sabha menden 26 prongla nung takok angutsü aser vote tali lakh 5 agi takok angutsüsa meranga inyakang, ta ayongzüka liasü.



February 08, 2024 nü New Delhi nung Bihar Chief Minister Nitish Kumar-i BJP lenir tain aser taoba mapang deputy prime minister, L.K. Advani ajurudang tangokba noksa nung angur.



# TIR YIMYIM

## YIMOBILEM (EDITORIAL)

DIMAPUR ROGONÜ, FENRUARY (TSÜKLAI) 09, 2024

### Kenaser saisapong jangraba lima

**N**aga lima ya tenem, ayong aser arem agi sünga aliba topur tajung lima ka dang masü saka yangji aliba Naga nungertema jangratemtsüka, kentenmenü aser saisapong nung tejangra, mulungso aser sempet tajung keta aliba purtem lir. Anüolen aliba tashitemetet aser takar limatem ama asünungbo, Naga nunger kentener aser saisapong nung ajunger aika alimai meteta nungtugu aser takar kümer alitsüba purtem ser nung, asenok alima tila, sensaker aser tangar menepa tashitemetet maliba agi arem naro shingaia memetet pongdok amai sempet tajung akar aika pei sempet agi rongsen mekümtet, jangratema alitsü melen, timtemseta aliba asenoki angur. Iba tiaji tajungba küma yanglushitsüba kenten aser asayartemi pei sempet meteta tajungba –tajungba küma meyushia amshitetsüsa senotsü agi parnokji yarir alitsü nungdaker. Atangji, Naga nunger lanurtem dak item sempet alibaji meteta Nagaland state government-ia sentong tapu balala ayongzüka lanurtem ajungshiba angur. Ajisüaka, hornbill benjong ama nung tangar dena jaoka lanurtem shilem agidaktsüba mesüra Naga nunger lanurtem khen khen bendang leni kenten sentong nung adentsü yokba kisung agibo Naga nunger kentertem pei sempet agi pei mapa aser rongsen küma lia moutettsü aser moutetter. Kasaji, saisapong nunga tesem kar nung asayadak tajung yanglutsüba agi mesüra saisapong sentong kar nung shilem agidaktsüba kisung agibo Naga nunger chanutemi tangar alemtetsüsa talangka moutettsü. Tangar amaji sempet aketertembo tajung kümdaktsünüba agi Nagaland nunga asayartem azungdak aser alidak tesem balaka mesemteta lir. Ajisüaka, government-i asayartem anepalubarenji reprangdangra, tangar den toktepa tajung akümtsü sayur memesük zübazübaa ka dang angutsü. Item timtem aser tamakokji Nagaland nung government dak alaka kentener aser asayartem nungdak peria agüja yaritetsüsa industry aser business company kata maliba ajanga lir. Tangar state-tem nungi asayartem tajung adokba ya, atangji, peisasa pei azüoka merangba kulia lir, saka iba amaji teimla tulu nung peisasa pei taküm aser mapang ajak bendanga agüja merangtsüsa tashi angubaji industry aser company-temi yarir. Ibaji kodang asenoki angatetdir, Nagaland nung Nagaland government-i rongsen poktetdaktsüba lenmang sayua lanurtem dang company tenteta industry tapu balala lapoktsü ajungshitsü aser lanurtemi government mapatem dang nungibo entrepreneur küma business inyaktsüang jangratsüsa lenmang tapu balala sayutsü. Aji oda, Nagaland nung state government-i kentemenü aser saisapong nung temulung agütsüba ama, Nagaland nunga, tangar lima nung ama, industry tapu balala lapoka rongsen poktetdaktsütsü asoshi ajungshia inyakra, kentener aser asayartem nungdak peria angutsüsa item industry aser company-tem jagi 'sponsor' asütsü. Tangbo kentener ka nem gitar ka alitsüar mali timtema alitsü. Kasaji asayartema asayadang amshiba osettem malitet aser tangaleni onüaka makamaitba agi moutet timtemba purtem aika alitsü. Itemji asenok ama government-i meyaritettsü, anungji asen lima nung kentener süshia, asayartem süshia alimai metetsüsa nungtugu kümdaktsütsüsa teyarirtem nungdaker. Tangatsüa majung aser tejembitsüa mesadem, ajisüaka state government-i kentener aser asayartem amshiba yabo, parnok jenjang ajungkettsütsü atema masü, benjong longsutsü atema amshirba dang lir. Joko, asenoka tangatetba ka dangi arur, sempet ajak benjong amungdang raksatsüsa mesüi pei dak aketba sempet agi alima nung nungtugu aser takar nisung küma benjonga dena ayongzüktetsüsa adokdaktsütsü nükjidorong yur, kentener aser asayartem rongsen agi nungita yaritetsüsa lisopurtem rongnung industry aser company kiburtem adokdaktsütsüsa government-i lenmang lapokja ajungshiteptsüla. Iba jagi dang, Naga nunger dak kententsü aser asayatsü sempet alibaji rongsen küma amshitetsüsa teyarirtem alitsü.

## OLEMSABANG

### Khristan Taküm nung Pandemic Angatetyim kar

~ Mr. M. Imkong Imchen

#### Okila:

Tanü alima rangben tamatari pesaprong tepangkatsü tensa kati menebogo. Anogo shia tetsübotsü osang jenti angashir, koba shidak koba tai mebendangteter. Asung kechi ataloktsü memetet, tekolok aser temulungjang anisungzüka maka amang tulu kati longpanger tebenja tsüki nung nemdener ka ama kümogo.

Aikati ashitsü, iba ya meimchir dak alangba temerenshi ka Tsüngrem nungi yokba lir ta amanger ta ashitsü. Saka osang tajung Yohan 9:2-3 nung Yisui telangzüba ka agüja lir. "Tesayur, iba nisung tenük poker asotsüsa pai asü, pa tsüraburi asü, shibai temenen benshi? Yisui langzü, "Iba nisung mesüra pa tsüraburi temenen mebenshi, saka pa dak Tsüngremer mapatem jungkai adoktsü asoshi liasü".

Iba Lai O dak ajemdaker tanü Covid-19 wara ajanga alima rangben timtimdaktsüba maparen ya lenmang asem nungi angatetsü merangdi.

#### 1. Pandemic Wara Temoatsu :

- \* Lockdown aser quarantine maparen ya lenmang aisü nung neburtem asoshi tanela nung temoatsü anguba mapang ka lir. Lai zünga sarasademtsü mapang tajung peria angur. Pei temenen nangzüka tekümtet jangjashia tanela nung temoatsü anguba mapang ka lir.
- \* Pandemic ajanga timtim tulu bener arutsüogo. Saka asenoki ya metetdi timtim ajanga temelenshi bener arutsür, mulungsentsü temerang sama aliba takümjia iba mapang nung Tsüngrem bushia arur, pei temenen nangzüka Tsüngrem chir akümer.
- \* Pandemic wara nung kümzüksü asoshi yimyangya libaliro achi ajemba ajak melenshitet nung dang kümzüksü akok ta tesayuba agütsüba ajanga aika taküm yimya melenshiogo, temesepba chiyongtsü, sali, moko, yi, talab ajak indokogo aser vitamin aketba chiyongtsü aser süngjanglijang, süngolio achiba ajanga temang nung tashi tasen aruogo.

#### 2. Pandemic Temerenshi:

Tsüngremji tematiba yimsüsür ajak yanglusang aser alima rangben Pai achaayanger Pai par chir nem temerenshi agütsür ta Laishiba nung kanga jangja zülua lir (Ibri 12:6) Pandemic temerenshi kehiba aru ta surapangla tanu asen putu Tsüngrem külemtsü melena Science & Technology külemer, nungtogo nisungtem sports stars, actors, singers aser alima chubatem (celebrities) külemer. Rongsen aser alima shisatsü bushilen 24x7 mapang indoker, saka Tsüngrem asoshiho mapang mali. Yamaji asen putu neburtemi taoba pututem ajak temenen ajangteta temenen benshidar, aser temenen mojing alima ajak madak chuba kumdakja külemer. Tanu tasüba wara yagi alima rangben makyonga arudang, meimchir jenokdak mali kümogo, teimla samaogo ta angudang, iba pandemic wara ya Tsüngremi alima dangi temerenshi ka yok ta amanger. (T. Mapa 7:51, Ezekiel 18:31-32).

#### 3. Pandemic ajanga tetendangba :

- \* Pandemic ajanga bener arutsüba timtim tekangshi, lendong ajakji Tsüngremi asenok tendangba mapang ka lir. Iba lendong mapang asenoki Tsüngrem dak tamang kateter asü masü, asen temulungjang ajak agi Pa meimer asü masü ta tendangba mapang ka lir.
- \* Kodang tia tamajungba kati meneba arur, iba tensa ajangdanga aotsü asoshi Tsüngrem dak tamang ayur asü, mesürapangla tetsübo nem kokdaktsür ta Tsüngremi asenok tendanger.
- \* Lendong mapang Laishiba dangi meyiper asü mesürapangla pei ali rongsen, adianu, tembar dak teimla ayur ta Tsüngremi tendanger.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Russia nungner sepaitemi putir aser pastor aika tepsetogo



Washington, D.C nung ayongzükba IRF Summit nung Ukraine nungi pastor, Mykhailo Brytsyn-i "Faith under Fire" report metetdaksüdang tangokba noksa nung angur.

**February 08, 2024:** 2022 küm February ita nung Russia nungner sepaitemi Ukraine amak tenzükba sülen nungi tang tashi nung sepaitemi Ukraine nung yimsü anema inyakba tatalokba 76 lir, ta tawa Washington D.C nung ayongzükba International Religious Freedom (IRF) Summit nung Arogo lenirtemi metetdaksü.

Ukraine amak tenzükba sülen Evangelical Khristantem, Baptist, Pentecost aser Seventh-day Adventist Khristantem kanga timtemogo, ta Parliament Commissioner for Human Rights in Ukraine, Dmytro Lubinets-i IRF summit nung metetdaksü.

Lubinets-i, "Russia sepaitemi Evangelical tamangertem ya America nungner atema itangitertem, telemsa adokdaksürtem aser Russian Orthodox Khristantem atema tsükchirtem, ta tai tonglokja Khristantem anema inyaker," ta metetdaksü.

Paisa, "Nisung ka tepsettsü, Tenla ki ka raksatsütsü aser linük ka samatsütsü atema Russia nungertem ajak inyaker," ta metetdaksü.

Russia-i Ukraine amak tenzükba sülen Russia nungner sepaitemi tamangertem anema inyakba tatalokba 76 lir, Russia nungner sepaitem aser ketdangsertem Ukraine nung yimsü lenirtem 29 puogo aser karbo tepsetogo; ajisüaka iba dang nungjagi teimba asütsüa akok, ta pai ashi.

"Russia nungner sepaitemi Khristan lenirtem aser tamangertem pua ayu, reshikangshi, tashiyim amshia taküm raksatsü aser tepsettsü amokmeren. Parnoki injang khalokja amokmerener aser kibong züngsemtem tepsettsü ta amokmerener. Item nisungtem ya taochi makai pua yur tzü mesüra chiyungtsü magütsüba den külemi metsümeshidak magütsü," ta pai metetdaksü.

Ukraine nung pastor ka, Mykhailo Brytsyn leniba nung tekülem sentong tagidak mapang nung Russia nungner sepaitemi timtem agütsüba sülen Tenla kiji shibangtsüogo. Pastor-i, Russia-i amokbangba yimti ajak nung Tenla kitem shibangtsüogo, ta ashi.

IRF Summit nung pastor Mykhailo Brytsyn-i 'Faith under Fire' report metetdaksüdang pai, "Ni ama pastor aser putirtem aika amokmerenogo, mezüngmeshi, pua ayu, azük aser Russia-i yok. Putirtem aser Khristantem karbo tang tashi Russia nungner jail nung lir aser parnok karbo tepsetogo," ta metetdaksü.

Lubinets-i, Russia nungner sepaitemi yimti tasen amokbangba sülen mezüngbuba nung Tenla kitem raksatsür, ta metetdaksü.

2022 küm November ita nung Evangelical Arogo ka nung deacon aser par jabaso na Russia nungner sepaitemi puer aoba sülen anogo ishika lir tena arem nung khaseter lia angu, ta pai ashi.

"2023 küm August ita nung Russia nungner sepaitemi Kherson Region nung aliba Roman Catholic Tenla ki amak. Parnoki Arogo züngsemtem dang, iba ya kiralongrartem anema mita aoba operation lir ta ashi. Item ama tatalokba aika lir," ta Lubinets-i metetdaksü.

2022 küm February ita nungi tenzükba tang tashi nung Russia nungertem yimsü dak sendakba kiojen 600 dak tema raksatsüogo; item kiojenji Protestant, Yihuda nungertem, Catholic aser Muslim nungner tekülem kiojentem liasü, ta pai ashi.

Yaküm November ita nung Religious Freedom Initiative of Mission Eurasia, USA-i report ka ajanga, Russia-i Ukraine amakba ajanga Evangelical Khristantem indang sarasadem ki 206 densema yimsü balala

indang kiojen 630 raksatsüogo, ta metetdakja liasü.

"2014 küm Russia-i pusema separatist movement tenzükba sülen Russia-i amokbanga aliba Donetsk aser Luhansk Region na nung tamangertem aika reshikangshir. Ukrainian Orthodox Arogoi dang timtem majangshir, kechiyong iba Arogo yabo Moscow Patriarchate den sendaktepa lir," ta kasa report ajanga metetdaksü.

Russia nungner ketdangsertem Ukraine nung aliba Orthodox Arogo, Ukrainian Greek-Catholic Arogo aser Evangelical Arogo nung züngsemtem ya tsükchirtem aser Ukrainian mesüra American intelligence services atema itdangitertem lir ta tai tongloktsür.

"Putirtem aser pastor temi Security Service of Ukraine den amalitepa inyaker, raraba hadir rizünger, tapoktsü osettem shibelener aser sepaitem anema apusotsü ajungshir, ta tai tongloktsür," ta report nung shia lir.

State Service of Ukraine for Ethnic Affairs & Freedom of Conscience to the Council of Ministers nungi Viktor Zelenskyi-i IRF summit nung adenertem dang, "Russian Orthodox Arogo aser iba Arogo nung tongti, Patriarch Kirill ya Russia nungner sepaitem atema hadir dang masü saka parnoki shilem-a agir," ta metetdaksü.

"Russian Orthodox Arogo nung tongti Patriarch Kirill-i Ukraine anema apusor sepaitem moatsüba dang masü saka pai yimjak nung Ukraine nungner maitsü aser oshi samatsüner, ta jembio," ta Zelenskyi-i metetdaksü.

"Nisung jenti asüba atema tongti aibelener rongnung Patriarch Kirill densema lir, ta nibo bilemer. Ukraine nung meimchir temeden aser yimsü temeden anema pai inyakog," ta Viktor Zelenskyi-isa metetdaksü.

## ANOGO ABEN TSÜNGREM DEN

### Ne Tsüngrem ajurutsü renemang

Aser Kibubai Mosa dang ashi, Nisungtem dangi oang, tanü aser asüng parnok meshitetta yuang, aser parnok süoshi shidokjang, aser tasemnübuba asoshi renema liang: kechiaser tasemnübuba nung nisung ajak tsüngdang Senai tenem manung Kibuba alutsü. Anitet 19:10-11

Tsüngrem den ajuruteptsü terenemba nüngdaker. Tsüngremji tesüngmangtsü aser tabensa temeshi lir. Merenemi Tsüngrem tsüngdang nokdakbaji tesempatsü mapa lir. Israel chirtemi Tsüngrem den ajuruteptsü asoshi parnoki anogo ana renemtsüla ta Tsüngremi parnok nem ozüng agütsü. Kodang nisungtem renema liasü Tsüngremi tsüngmok aser tsüngpret, mi aser mokozi aser jemji ola dena nübür tem den jembü (Anitet 19:16-25). Iba tajurutepeba nübür Pa jenjang nung alitsü asoshi Pai parnok nem ozüng ter agütsü.

Iba yagi ne kolok, temulungtetba aser ne mulungjang nung mapa meinyakdaksüi anogo shiaji süidaktsütsü makok. Ibai Tsüngrem leman nungi pilatsü mapang talang ka magir. Alimai ne tanelaren samatsütsü mapa inyaker. Nübürtem alima nung anogo terok lir tenetnübuba nung Tsüngrem dang aser parnok asoshi Pai mulungba nung anogo tepiyong ranglokdaktsütsü asoshi Tsüngremi Sabbath tentet.

Nai ne mapang tekülem asoshi renema alir asü? Taküm mapang matongdang ne mulungjang kechi agi süngdaksür? Aonung ne mulung nung bilemba aiben anepdang ibajisa bilema alir. Temerük tekülem asoshi tanelaren terenemba tenüngdaksü. Nai tekülem nung ajangshiba jagi ne tanela renemba nung yaritsü. Tsüngrem den ajuruteptsü asoshi ne sasa renemang.

## Uttar Pradesh nung putir ka den pastor 5 apu

**February 08, 2024:** Uttar Pradesh state nung Catholic parnok "Khrist Bhakts" putir ka den Protestant pastor (Khrista sülen anidakertem) ta pongui kanga sensaker Hindu nungertem Khristan yimsü dangi meyipdaksütsü meranger, ta tai tonglokja police-i puogo.

Barabanki district nung Hindu yimsü alia amangertem police nem osang ka metetdaksüba sülen February 5, 2024 nü police-i Lucknow diocese nung Catholic putir, Dominic Pinto den Protestant pastor temji apu.

Hindu yimsü alia Hindu yimsü alia amanger, amangertem jagi, Navintha Brijesh Kumar Vaishya-i, nung lokti tulu adenshia Khristan putirtem aser pastor sentong agidang nisung aika temi Dalit Hindu nungner sensakertem, talisa tetsür aser meyipdaksüogo, ta putir aser tanurtem mesüzüka Khristan pastor tem nem tai tongloktsü, yimsü dangi meyipdaksür, ta diocesan pastoral center-i tai tonglokja liasü.

Taküm küm tenzüker tang February 6 nü tashi nung Uttar Pradesh nung osangbenertem den jembidang anti conversion ozüng kübok tai Lucknow diocese nung tonglokja Khristan 26 puogo.

chancellor, Donald D'Souza-i, Yaküm January nungi "Tai tongloktsüba nungji ochi November ita tashi nung India tala kata mali. Sarasadem nung Khristantem anema sentong nungji Pinto bo maden inyakba tatalokba 687 liasü saka pastoral center nung aser iba nungjagi tatalokba 287 bo Uttar Pradesh state kija sentong agitsü atema pai nung liasü (United Christian Forum report)."

AO OSHI ANGAZÜKDAK:

TANÜ ANGAZÜKTSÜBA OJANG



Shiti

(n) osang zülur yokba kaket (letter)

\* Tanü asüngbo shiti kangabo mezüluteper.

Shiti

(adv) rongsen kanga tulu aketba ( large amount of wealth)

\* Yimti nung takartem meyong ki shiti aika lir.

OLONG PAITEP # 6692

Grid for crossword puzzle #6692 with numbered starting points.

TIPIEN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprängzük - (4)
10. Tasola - (5)
11. S \_ \_ \_ \_ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. \_ \_ \_ hi - (3)
16. Akümüli nungi pilar - (3)

OLONG PAITEP # 6691 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü,
5. Lenti, 7. Tajangzük, 11. teronem,
12. Sempa, 13. Jahaz.

Assam: AAP-i Lok Sabha election atema candidate sangdongogo



Guwahati, Tsüklai/February 8 (Agencies): Aam Aadmi Party (AAP)-i Brehostibarnü (February 8) taruba Lok Sabha election atema parliamentary menden asem asoshi Assam nung party candidate sangdongogo.

AAP-isa, Assam nung iba constituency asem nung tokteptsü atema INDIA bloc-i parnok nem temelaba agütsütsü imla atar, ta ashi.

Party-i Assam nung Dibrugarh, Guwahati aser Sonitpur constituency atema candidate sangdongogo.

AAP-i sangdongba candidate tem rongnung Dibrugarh nungi Manoj Dhanohar, Guwahati nungi Bhaven Chaudhary aser Sonitpur nungi Rishi Raj nunger densema lir.

"INDIA bloc-i iba ya agizüksü ta onoki tamang akar. Ajisüaka ajak dang tongtibngtibaji election akoktsüba lir. Item menden asem asoshi onok renemshia tenzükogo," ta AAP Rajya Sabha MP Sandeep Pathak-isa.

"Maparen ajak takaratiba nung inyaksüla. Sensaksem ita aika agia arudar, ajisüaka tang tashi kecha mekümet. Modi sorkar anema nokdakba mapang onok INDIA bloc den densema lir. Alliance nung telemtetba ajak tangsa tang agitsü nungdaker," ta MP Sandeep Pathak-isa shisem.

Assam indang ali hectar '83,000 kidanger state temi atsüngogo

Guwahati, Tsüklai/February 8 (Agencies): Assam indang ali hectar 83,000 shi Northeast nung kidanger state temi atsüngogo.

Iba osang ya Assam border protection and development minister Atul Bora-i, BJP MLA Bidya Sing Englang-i ken o jangjanüa shiti ka züluba dak sendakba nung telangzüba agütsüba mapang shia liasü.

Assam minister-i ashiba agi, Assam kübok district 17 nung ali hectar 82,751.86 kidanger

state pezüi atsünger lir.

Item Assam indang ali ya Arunachal Pradesh, Nagaland, Meghalaya aser Mizoram-i atsünger lir, ta minister-isa ashi.

Kidanger state temi atsünger aliba ali hectar 82,751.86 nungi ali hectar 59,490.21 bo Nagaland-i atsünger lir ta minister Atul Bora-i ashi.

Kasa mapang nung Meghalaya-i Assam indang ali hectar 3441.86 atsünger lir, koba state pezü rongnung ishiba asütsü.

Kasa mapang nung Arunachal Pradesh aser Mizoram nati Assam indang ali hectar 16,144.01 aser 3675.78 atsünger lir, ta pai shisem.

Ali atsüngba agi kongshir aliba district tem rongnung Sonitpur, Biswanath, Lakhimpur, Dhemaji, Tinsukia, Dibrugarh, Charaideo, Jorhat, Sivasagar, Golaghat, Goalpara, Cachar, Kamrup, South Salmara-Mankachar, West Karbi Anglong, Hailakandi aser Karimganj densema lir.

Arunachal: AKKDSU-i ozüing alema pranbong amshiba azüoktsü akhang

Itanagar, Tsüklai/February 8 (Agencies): All Kurung Kumey District Students Union (AKKDSU)-i, Arunachal Pradesh nung ozüing alema hadir benshiba aser pranbong license taila amshiba kanga bulua akümba süoki ia agiba lemsatepogo aser ashiba agi, iba ajanga taruba 2024 election mapang azütokshi lendong ataloktsü akok.

"Election tonga arur asünung administration aser police-i ozüing alema amshiba pranbong aser aser license tailatem azüoktsü kanga tongtibang," ta AKKDSU

general secretary Bapu Bengia-i ashi. Paisa, pranbong kanga bulua amshiba ajanga 2019 küm election mapang district nung tensa kanga mejungi akümba indang lephshia jembia liasü.

Ken o dak sendakba nung AKKDSU Tir Tarh Demi-ia, election yimjung nung agitsü koda tongtibang iba indang lemsatepba den district deputy commissioner aser superintendent of police dang Section 144 benoktsü atema takhangba ka agütsütsü atema sentong aliba lemsatepa liasü. "2019 küm atalokba tanaben

lephshia matalokdaktstüla," ta kaketshir lokti tentet yagi ashi.

Osang ajanga ashiba agi, Kurung Kumey aser Papum Pare district na nung nisung 129 ket nung pranbong license taila bena lir.

Ketdangsürtemi Kurung Kumey kija nunga Sangram nung ozüing alema amshiba pranbong 61 puogo aser Nyapin nung 31 aser Nyapin nung 28 puogo.

Iba den bendenloksema Kimin, Banderdewa, aser Itanagar police station tem nung pranbong license taila trok putetba osang ajanga metetdaktüsügo.



CALLING FOR ENTRIES 18th Mumbai International Film Festival MIFF

15th June - 21st June 2024

DOCUMENTARY | SHORT FICTION | ANIMATION

Early Bird Deadline: 15-2-2024 | Late Fee Deadline: 29-2-2024

SCAN THE QR TO APPLY OR VISIT:

miff.in/film-entry/ or filmfreeway.com/nationalfilmdevelopmentcorporation



HIGHLIGHTS

INR 44 LAKHS TOTAL CASH PRIZE IN VARIOUS CATEGORIES

GOLDEN CONCH + INR 10 LAKHS FOR THE BEST DOCUMENTARY

- BEST DEBUT FILM
BEST STUDENT FILM
TECHNICAL AWARDS
A SPECIAL AWARD

### PM Benjamin-i Hamas indang ceasefire

### sentong magizük

**Jerusalem, Tsüklai/February 08 (Agencies):** Hamas-i ceasefire atema benokba onüktem Israel Ato Kilonser Benjamin Netanyahu-i magizük aser Gaza nung ita ishika tsüngta takok angutsü ta ashi.

Israel-i yarisema yangluba ceasefire proposal nung telangzüba agüja Hamas-i taginübatem lemsatepba sülen pai iba o ya ashi.

Iba telok den jembishinüba tatem kati marutsü aser parnoki aginüba ya tesüngmangtsüka lir, ta pai ashi.

Tangatetep kati arutsü meranga maneni jembishinü akar.

"Jungjunga takok angutsüba dak alaka danga lenmang kecha mali. Gaza nung Hamas mesamai lira, ano mapang ka azüdokshi ajurutsü," ta Netanyahu-i Bodhbarnü osangbener dang ashi.

Hamas-i benokba nung Israel-i jembishinüba angatetteptsü imla liasü, saka iba telangzüba yabo artsüba amai lir aser Hamas-i iba rara tembangtsü merangba ya Israel ketdangtsüri magizükteter.

Yimjung asoshi Egypt aser Qatar tetsüngtai ia jembishinüba aruba maparen Cairo nung Brehostibarnü maneni inyaktüsü imlar ta Egypt nung osang kar ajanga ashi.

Egypt-i telok ajak dang tangatetep kati arutsü asoshi atsü-anem akatsü ayongzüka lir.

Hamas-i ceasefire proposal atema Mongulbarnü counter-offer agütsü, koba Qatar-i kanga junger ta shia liasü.

Ceasefire atema Hamas-i benokba nungya noklem asem lemsar lir aser mezüngbuba noklem nungya anogo 45 rara anena atatsü aser iba mapang Israel tsür pua alir ajak, tebur arishi küm 19 tekübok, taintem aser shirangertem den Israel tepuokdak Palestine nung teretsür aser tanurtem yua aliba melenteptsü.

Israel sepaitem Gaza nung nisung aika aliba tesem nungi ainshitsü aser mozüki aser refugee camp tem tanaben yanglushi tenzüksü.

Tanabuba noklem nung tanüngba Israel nung pia alirtem ya Palestine nung tepuokdak alirtem den melenteptsü aser Israel sepaitem ajunga Gaza nungi ainshitsü.

Tasembuba noklem nung anatsülen nungi nisung tasümgang melenteptsü.

Iba tezüngzüktep kübok Gaza nem chiyongtsü aser danga teyari agütsüba tali akumtsü liasü. Anogo 135 tashi rara anena ataba tembangdang rara anentsü asoshi jembishinüba tatem kati arur alitsü ta Hamas-i ashi.

(Maneni tapak 8 nung...)

### MULUNGNEN O



(Asür) Wabong OBANGZULU PONGENER (27/01/2024)

Temeimtiba obala, (Asür) Wabong Obangzulu Pongener (Chuchuyimlang) akümüli mapang, shirangdang aser tasüba anogo nung shirnokisa, sarasadem nüktzü, nübo, rongsen aser maparen balala ajanga yaritepogo, kangasa pelar. Tsüngremi nenok maneni moajangma. Nüja aser lokti ajak tenüng nung, item Loktitem adoktsür:

- Chuchuyimlang Town Baptist Arogo
- Yimsem Ao Baptist Arogo, Eralibill
- Kohima Ao Baptist Arogo (KABA)
- Dimapur Ao Baptist Arogo (DABA)
- Dibua Compound Baptist Arogo
- GPS, Chuchu Town
- Department of Physics, Kohima Science College
- DIET, Dimapur
- District Hospital, Tuensang
- Postal Department, Mokokchung Division
- PWD, Mokokchung
- VDB Association, Chuchuyimlang Block
- Senior Citizen's Forum, Chuchu Town
- Sangpangmen Mepu Telongjem
- Imlang Mepu Telongjem, Chuchu Town
- 3 Buba Kosasanger Sungpu Zunga, Chuchuyimlang
- 3 Buba Riongsanger Sungpu Zunga
- Chuchuyimlang Putu Yimsusurtem

~ Temeim Chirnur, Semchir, Kinunger & Ashiportem.

### North Korea-i South den rongsen-ketzüng tesendaktep ajunga rakdangogo

### Pyongyang, Tsüklai/February 08 (Agencies):

North Korea indang parliament-i South Korea den rongsentektzüng tesendaktep asoshi yangluba tezüngzüktep ajunga indokogo.

Taoba ita Pyongyang-i Seoul ya par tsükchir tongti ta sangdongba sülen tang tesüsa telemtetba ya agir, anungji linük ana tanaben lungjemdaktüsü asoshi bendanga agütsür inyakba ajunga yutsür aser rara mapang South Korea atsüngdoktsü amokmerener.

Policy balala agizüksü asoshi mera agiba Supreme People's Assembly ya yimsü tesüdag Workers' Party-i ashiba angar aser parnoki Bodhbarnü vote agitepba nung Korea linük ana tsüngta rongsektezüng tesendaktep agientsü renem, ta Brehostibarnü Korean Central News Agency (KCNA) ajanga ashi.

Korea linük ana tsüngta tesendaktep kanga mejungi lir, aser tongtipang project tem küm aika meinyaki arur, kechiaser Pyongyang-i nok-nü yangluba maparen tali inyaker aser Seoul-i United States aser Japan den mitkar tesendaktep tali tajungba yanglur.

Assembly ajanga Mount Kumgang tourism project inyakyim indang ozüngtem agienogo, koba 2000s tetenzüklen nungi linük ana tsüngta rongsenketzüng tesendaktep temaitsü ka ama liasü aser South Korea nung million ana jungnüai semdanga liasü. Iba resort ya South Korea indang Hyundai Asan ajanga

yanglu. 2008 küm South Korean tourist ka 'restricted zone' telungi aitba yong North Korean guards temi khasetba sülen iba project ya anena liasü.

Mount Kumgang resort ya mapang ka Korea linük ana atema project tulutiba ana rongnung dena liasü, kaji tang shibanger aliba Kaesong industrial zone liasü. Kaesong industrial zone tajungdang South Korea nung company 125 shi liasü aser yangji North Korea nung nisung 55,000 shi mapa inyaka liasü.

North Korea-i nuclear aser missile tendangba mechi 2016 küm Seoul iba project nungi ainshi aser Kaesong nungi tajangzük anguba amshia parnok den rara mesür ta shia liasü.

Arütsü anasa tensa tajungba kumdaktüsü mechi 2018 küm zülutepba military pact ka North Korea-i taoba küm tembanga liasü.

Pyongyang-i iba mera agiba ya temelenshi alakteta lir ta South Korea Tir Yoon Suk Yeol-i Bodhbarnü ashi aser par tasa angatetsü tasak ta ashi.

"Memelenshibahi North-i küm 70 dak tema asenok Communists kumdaktüsü merangba ya lir, aser aji inyakdang parnoki conventional weapons ya teperi masü ta angateta asenok amokmerentsü nuclear yanglu," ta pai ashi.

North Korea den jembishinü akatsü renema lir aser nungdak nung teyaria agütsütsü saka North Korea lenirtem dak tangatetba mali, ta ashi.

### Pelaba Lemsateper



ASO : 02/07/2000

ASÜ : 05/02/2024

Onoki teti meima aliba asür **Sentirenla Imsong**, shiranga aliba mapang nungi tasü nü tashi shirnokisa tamang sarasadem den rongsen aser nübo agi yariogo, nenok kija, kibong aser lokti ajak dangi tsüngdong marutetaka, iba sangdong ajanga kanga pelaba lemsateper. Nenok temeim mapa asoshi Tsüngremi maneni moajang ta ozü sarasademtsür.

Talisa item kibong aser lokti dang kangasa pelaba shisemer:-

1. Shri. Sharingain Lkr, Speaker NLA
2. Longmisa Senso Telongjem Mokokchung,
3. Longmisa Sensotsür Telongjem Mokokchung,
4. Longmisa Senso Fellowship Mokokchung,
5. Aloyong Mepu Dilong Ward,
6. Dilong Ward Yimden,
7. Tongpok Semchir Imsong Unger Kidong Telongjem,
8. QMHSS 2017 - 19 Batch,
9. JMC History Dept. - 2020 Batch,
10. GMSA&B Sector,
11. Telongjem Lok,
12. MTBA/MTBA Choir.

Temeim Tsürabur aser Kinungertem

### TSÜNGREMER TAOCHI NUNG KÜM 90 AJUNGER



Tanü 9th February 2024 anogo nung ozü tsürabur **Mr. Lepden Walling** küm 90 abensadaksü nung Tsüngrem tulusang nem tenüngsang aser tetushi ajak agütsür.

Oba, nai taküm junga litetba yong iba anogo ya tashi moaja lir. Na onok chimur aser semchisemnurtem asoshi temoatsüba taküm aser akumdong lir anungji Tsüngremi ano maneni nü taküm aser arishi moajangma ta onok sarasadem.

~ Temeim Chirnur, Semchisemnur aser Kinungertem.

### Pakistan nung mobile internet shibanger elections agiogo

### Islamabad, Tsüklai/February 08 (Agencies):

Ketdangtsürtemi mobile calls aser data shibangtsür Pakistan nung election agiogo, kong nisung million aikati sorkar tasen asoshi vote agütsü.

Kiralongraba nungi kumzüksü mechi internet aser mobile service ya shibang ta interior ministry ajanga ashi.

Küm ana jakdang no-

confidence vote agia ato kilonser menden nungi Imran Khan atsüngdokba sülen election tang ang agir.

Asemben ato kilonser inyaksang Nawaz Sharif-ia shilem agiogo, koba Pakistan nung election shidak magiba rongnung ka lir ta teshisadanger temi ashir.

(Maneni tapak 8 nung...)

# Nagaland Olympic aser Paralympics asaya osang

**Dimapur, Tsüklai/February 8 (TYO):** Taküm Nagaland Olympics aser Paralympics nung asaya kar jelia tenzükogo aser tang cricket aser football asaya nung district balala toktepa asayadar.

Cricket asaya nung tanü Mon aser Phek na asayaba mapang Mon nungi asyartemi over 20 nung asayar 1 out sür run 203 yanglua liasü. Asaya tanabuba shilem nung Phek-i over 20 nung asayar 6 out sür run 106 dang yangluteta asaya

makok. Iba asaya Mon-i run 97 agi koka liasü. Tanabuba asaya Tuensang aser Wokha na asayaba Wokha-i wicket 8 agi kokogo. Asaya nung Tuensang team-i over 20 nung asayar 8 out sür run 78 yanglua liasü aser iba run ya Wokha-i over 13.1 nung asayar 2 out sür menepa liasü. Parnoki run 81 yanglu.

Tasembuba asaya nungi Mokokchung-i run 28 agi Tseminyu kokogo. Asaya nung Mokokchung team-i over 20

nung asayar 8 out sür run 154 yanglu. Ajisüaka Tseminyu team-i over 20 nung asayar 8 out sür run 126 dang yangluteta parnoki asaya makok.

Tebur football asaya osang: Dimapur 1- 1 Longleng Mokokchung 1- 6 Phek Nuiland 1- 3 Zunheboto Tuensang 0- 2 Mon Kohima 13- 0 Kiphire Shamator 0- 1 Peren Tseminyu 1- 4 Noklak Wokha 1- 4 Chumukedima.

# Küm 5 sülen Djokovic Indian Wells nung asayatsü



**Tsüklai/February 8, 2023 (Agencies):** Küm pongu sülen Novak Djokovic BNP Paribas Open nung taküm mezüngbuba asayatsü lir.

Teburtem rongnung temaba jenjang nung aliba asayar ya Indian Wells nung 2019 küm tatemsa asayaogo, kong pa tasembuba round nung tsüka liasü. Djokovic iba asayamung nung küm pongu tashi masaya kechiyong pa COVID-19 vaccine magi liasü. Taoba küm metsüwa tashi US-i aotsü atema bendangertem vaccine agitsü nüngdaka liasü.

Djokovic-i iba asayamung ya 2008, 2011, 2014, 2015 aser 2016 küm kokogo.

Iba asayamung asemen tashi koker aliba asayar Rafael Nadal-a taoba küm yiruba ajanga masayaba sülen takümbo asayatsü. Pa January ita-a yiruba ajanga Australian Open nung masayateti liasü.

Iba asayamung nung ATP aser WTA tours naprongla asayar aser March 3 nungi 17 tashi asayatsü.

Tetsürtem rongnung temaba jenjang nung alila Iga Swiatek taküma iba asayamung nung

asayatsü. Lai iba asayamung ya 2022 küm kokogo aser taoba küma semifinal tonga asaya liasü.

Defending champions Carlos Alcaraz aser Elena Rybakina nata iba asayamung nung shilem agiba angutsü. World No. 2 asayar Alcaraz ya 2017 küm Roger Federer sülen set ka nung danga tamakok mongui Indian Wells akokba mezüngbuba asayar aküm.

Maneni Australian Open champions Jannik Sinner aser Aryna Sabalenka nata iba asayamung nung asayatsü.

Teburtem rongnungi 2022 champion Taylor Fritz, 2023 runner-up Daniil Medvedev, Andrey Rublev, Alexander Zverev aser Andy Murray nungera densema lir.

Temaba jenjang nung aliba tetsür asayartem rongnung Coco Gauff, Jessica Pegula, Naomi Osaka, Australian Open finalist Qinwen Zheng, Maria Sakkari, Ons Jabeur, Marketa Vondrousova aser Karolina Muchova nungeria iba asayamung nung shilem agiba angutsü.

# Wrestling Nationals Feb 28 nungi Mar 5 tashi Patiala nung asayatsü

**Tsüklai/February 8, 2024 (Agencies):** Under-15 aser Under-20 National Championships koba Gwalior nung taruba hopta asayatsü liasü, iba asayamung ya Patiala nung February 28 nü nungi tenzükaga asayatsü, ta wrestling ad-hoc committee-i Brehostibarnü metetdaksü.

State association kari asayamung atema renemtsü asoshi mapang atsüraba ajanga shilem magitetsüsa akümba osang metetdaksüba sülen ad-hoc committee shirnoki Wrestling Federation of India (WFI) inyakyim achaayanga arudar, parnoki iba asayamung thinenja liasü.

2023 U20 aser U15 freestyle, greco roman style aser women National

Wrestling Championship ya February 11 nungi 17 tashi Lakshmbai National Institute of Physical Education, Gwalior nung asayatsü liasü.

"U20 & U15 Free Style, Greco Roman Style aser Women Wrestling National Championship thinenogo aser iba asayamung ya February 28 nungi March 5 nü tashi Netaji Subhas National Institute of Sports, Patiala, Punjab nung asayatsü," ta ad-hoc committee mendenbuba Bhupender Singh Bajwa-i ashi.

"State Association temi mepeshiba ama iba asayamung atema renemshitsü asoshi parnok nem mapang talila agütsüsü asoshi nüngdaka kümogo,

ajita asünungdang asayartem shimba aser tanga inyakyimtem nendanga inyaka tembangtetsü," ta paisa ashi.

"Asayamung thinentü atema mepeshiba Ad-hoc Committee-i agizükogo, ajita asünungdang lanur asayar tajungtem aser tarutsü nung medal angutsüpurtem iba asayamung nung shilem agitsü atema maangka angutsü," ta Bhupender-i ashi.

Maneni pai ashiba agi, iba asayamung nung state 20 nungi 18 tsüngda nungi asaya 1200 nungi 1400 tsüngdai shilem agitsü. Ad-hoc committee-i taoba hopta Jaipur nung Senior National Wrestling Championship ayongzüka asayaogo.

# BENDANGLI OSANG : Tapak 7 nungi...

## PM Benjamin-i Hamas indang...

Taoba küm October 7 nü Hamas teloki Israel south tsütsü amakdang nisung 1,300 shi tepseta liasü.

Iba anogo nungi tenzükaga Brehostibarnü tashinung Israel-i Gaza amakdang Palestine nunger nisung 27,840 tepsetogo ta Gaza indang Health Ministry ajanga ashir.

Kasa mapang nisung 67,317 yirua liasü.

Tesüiba ghonda 24 tsüngta Israel sepaitemi nisung 130 tepsetogo aser 170 yirutsü ta ministry ajangasa ashi.

Nisung meyrirjang aika samar aser süogo ta bilemer, kechiaser Israel-i ambulances aser civil defence crews tem meyoker.

Gaza south tsütsü Rafah yimti nung operation agitsü asoshi renemshitsü Israel sepaitem nem totuyuba agütsüogo ta Netanyahu-i Bodhbarnü ashi, kong Palestine nunger meyrirjang aika jenoka lir. Netanyahu tangatetba ya Gaza tarutsü asoshi US aser Israel sentong nung maneni meputepba ajiteter.

Pai Gaza indang security

ajunga Israel-i anepaluner aser Hamas mesüra danga telok kecha dena sendaktepa maliba local bodies nem Gaza anidaktüsener.

Washington mangdang nung Palestine nunger linük ka kumtetsü lir.

Brehostibarnüa Israel sepaitemi Gaza Strip nung housing units 3,000 nung mi senlokja sen dollar million aika jenjang takoksa bener arutsü, ta Gaza indang information office ajanga ashi.

"Nüburtem, talisa pei ki yutsür tesem balala nung jenoka alirtem nem takoksa agütsüsü mechi Israeli occupation forces ajanga asaa nisung aliba ki nung mi senloktsü," ta sangdong ajanga ashi.

Gaza nung kuli tejangja makai ki rongdoktsüba mapang par sepaitemi video aser noksa tangoka social media nung prokshi, anungji ki rongdoktsüba nung parnok temlung süa pelatepba sayur, ta ashi.

Ibai international law nung maneni aibelenba mapa lir ta ashi.

## Pakistan nung mobile internet...

Ochimashi ken o nung taoba küm tepuokdaki yoksang Khan ya election nung shilem magidaksü aser par party-i internet shibangba ya tasü mait mapa lir ta ashi.

Polling experts temi sangdong balala nung vote agütsür ajema liasü ta ashir, anungji Khan'er PTI telok teimla ajema akumer. Mobile services shibangba ajanga voters temi parnok indang polling station tem angutsü tasak kumdaksü.

Voting tenzüksü minute 10 dang lia call aser data service tem shibang saka Wifi network bo menokdang amai liasü.

"Tawa linük nung kiralongra mapa ajanga senti takum jenti laluo. Tzüzüng-ozüng amshitsü aser lendong nungi jenbutsü mechi security mera agitsü tongtipang," ta Interior Ministry odongtari ashi.

Pakistan nung election anogo telungpuri lendong agütsüba otsü lir, saka Brehostibarnü election nung lendong timtem tesem kar nung dang atalok. Tamajungtiba ya linük north tsütsü Dera Ismail Khan nung liasü, kong police indang gari ka nung bomb poklokja police pezü asü. South-west Balochistan province nunga bomb apokdak nisung kar yiruba osang liasü saka asü-ama mali.

Bodhbarnü Balochistan nung candidate tem indang office ana nung bomb poklokja nisung 28 asü. Election mapang lendong timtem majurutsü aser nüburtem takum kumzüka

ayutsü mechi Afghanistan aser Iran den arütsü alema senzüba tesemtem osettsüset aser senzüsemponger atema shibanga liasü, ta foreign ministry odongtar kati ashi.

Sharif aser par jala Maryam nati Brehostibar nikongdang Iccbra, Lahore nung vote agütsü, kong security tesashi yoka liasü aser parnok müketa sepaitem aser phone signal tem nokangtsü jeep ka nung antenna songer liasü.

Election timi agi ama bilemer asü ta asüngdang dang, kanga junga ochi nung agiogo, ta Sharif-i langzü.

Pakistan nung nisung million 128 vote agütsüsü temsüa lir aser tesadang ka jungüa arishi küm 35 tekübok lir. Züngsem 336 aliba National Assembly nung menden 266 atema indang indanga shimer aser taküm iba atema candidates 5,000 dak tema aliba nungi tetsür 313 dang liasü.

Pakistan Muslim League (Nawaz) (PML-N) aser PPP ya party tulutiba ana ama züngshir.

Khan'er Pakistan Tehreek-e-Insaf (PTI) party nungi candidates shimsü tasakba, kechiaser parnoki amshiba cricket bay symbol ya nokdang.

PTI-i yariba candidate ya independent nungi tokteper aser parnoki temaitsü balala amshi. Pakistan nung electoral symbol ya kanga tongtipang, kong nütsüng yongsük shilem 40 dak temai mezüngteter.

**BILEMDANGANG**  
"Amajok watidak nü mapang tintok."